

E non fagades ende al por ninguna manera, so pena de la nuestra merçed e de seysçientos maravedis desta moneda usual a cada uno. E demas, por qualquier o qualesquier de vos por quien fincar de lo asi fazer e conplir, mandamos al dicho nuestro recabrador, o al que lo oviere de recabdar por el, que vos enplaze que parezcades ante nos, doquier que nos seamos, del dia que vos enplazare a quinze dias primeros siguientes, so la dicha pena a cada uno, a dezir por qual razon non conplides nuestro mandado. E de commo esta nuestra carta, o el traslado della signado commo dicho es, vos fuere mostrada e los unos e los otros la cunplieredes, mandamos, so la dicha pena, a qualquier escrivano publico que para esto fuere llamado, que de ende al que vos la mostrare, testimonio signado con su signo, porque nos sepamos en commo conplides nuestro mandado.

Dada en la çibdat de Leon, dos dias de agosto, era de mill quatrozientos e veynte e hun años. Yo, Ferrand Gomez, la fize escrivir por mandado del rey. Garçi Ferrandez. Vista. Diego Ferrandez. Vista. Gonçalo Ferrandez. Pero Ferrandez. Françisco Ferrandez. Gonçalo Ferrandez. Diego Ferrandez. Garçi Ferrandez. Fecho este traslado en la çibdat de Segovia, veynte e çinco dias de agosto, era de mill quatrozientos e veynte e un años. Testigos que fueron presentes e vieron la dicha carta oreginal onde este traslado fue sacado: Domingo Ramos. Johan Perez de Santa Maria e otros. E yo, Johan Lopez, de Sevilla, escrivano de nuestro señor el rey e su notario publico en todos los sus regnos, que vy e ley la dicha carta oreginal del dicho señor rey, onde este traslado fue sacado, e lo conçerte e lo fize escrivir, que va escripto en tres fojas de papel con esta que puse /mi signo/ en fin de cada foja, firmado de mi nonbre e fize aqui este mio signo a tal en testimonio de verdat.

(130)

**1383-IX-3.- Carta de Juan I para que el Adelantado no pueda poner a su hijo en su lugar. (A.M.M., C.R. 1384-91, Fol. 77, r.)**

Nos, el rey, fazemos saber a vos, Martin Alfonso de Valdivielso, comendador de Ricote, nuestro adelantado del regno de Murçia, quel conçeio e cavalleros e ofiçiales e omes buenos de la çibdat de Murçia nos enbiaron dezir que enbiastes agora a la çibdat a Johan de la Peña, vuestro fijo, para que usare por vos del dicho adelantamiento, e que enbiastes una carta a la dicha çibdat para que lo oviesen por adelantado por vos e usaran con el en el dicho ofiçio. E que ellos que lo non quisieron reçeibir entendiendo que non conplia a nuestro serviçio, ni a pro e regimiento de la dicha tierra, por quanto el es moço e non puede poner recabdo en el dicho ofiçio segund que deve. E enbiaron nos pedir merçed que vos enbiemos nuestra carta sobre esta razon. E sabed que quando nos vos



encomendamos el dicho ofiçio que nuestra entençion fue que vos, por vos mesmo, usades del e non por otro, entendiendo que por ser vos cavallero bueno e ançiano que porniedes en ello buen recabdo, segund que cunplia e nuestro serviçio e a pro e regimiento de la dicha tierra. Porque vos mandamos que vayades de usar del dicho ofiçio vos mesmo e estar y regidente, e que non enbiedes alla al dicho Johan de la Peña, ni a otro alguno, ca nos /enbiamos/ mandar al conçeio de la dicha çibdat que non reçiban a otro, salvo a vos, e si vos non podiedes usar del dicho ofiçio por vos mesmo enbiadmoslo dezir e nos porniemos a otro para que use del. E non fagades ende al.

Fecha tres dias de setienbre, era de mill e quatrozientos e veynte e hun años. Nos, el rey.

(131)

**1383-IX-5. Segovia.— Carta de Juan I sobre recaudación de almojarifadgos. (A.M.M., C.R. 1384-91, Fol. 76, v.-77, r.)**

Don Johan, por la graçia de Dios, rey de Castiella, de Leon, de Toledo, de Gallizia, de Sevilla, de Cordova, de Murçia, de Jahen e del Algarbe, e señor de Lara e de Vizcaya e de Molina, el conçeio e cavalleros e ofiçiales e omes buenos de la noble çibdat de Murçia, salud e graçia. Fazemos vos saber que viemos vuestras petiçiones que nos enbiastes, e a lo que nos enbiastes dezir en como los arrendadores del almojarifazgo desa dicha çibdat despues que sale el tiempo de la renta que trahen a los omes a pleito e a contiendas sobre el almojarifazgo del tiempo pasado, e que maguer an pagado que por quanto non usan los que pagan tomar cartas de pago de los dichos almojarifes, que por non andar en pleitos que an de pagar otra vez e que llieven algunos cohechos. E que nos pediedes por merçed que mandasemos que los dichos arrendadores que pudiesen demandar el derecho del dicho almojarifazgo fasta tiempo çierto, e que despues que non fuesen oydos sobre ello. Sabed que nos plaze dello, e por esta nuestra carta mandamos e tenemos por bien que los almojarifes que fueren en la çibdat agora e daqui adelante que demanden todo el derecho que oviere de aver del dicho almojarifazgo en el tiempo que los durare la renta e mas otros seys meses despues que la renta fuere cunplida e que dende adelante que non sean tenudos a demandar cosa alguna por razon del dicho almojarifazgo. E mandamos a los alcalles e alguazil de la dicha çibdat que si demandar lo quisieren que les non oyan sobre ello. E los unos e los otros non fagades ende al por ninguna manera, so pena de la nuestra merçed.

Dada en Segovia, çinco dias de setienbre, era de mill e quatrozientos e veynte e un años. Nos, el rey. Ferrand Arias.

